

痘疹會通

亨

痘疹會通卷之二

水泡血泡論

痘之起長屬氣痘之顏色屬血氣升血附氣血交會而毒化矣若氣虛血縮不能送毒外出則毒蘊于肌肉之間熱氣薰蒸于皮膚之外因以有水泡血泡之變其爲水泡也有肝邪勝而發者或氣有餘而發者有脾經過濕而發者有脾熱不解而發者俱各有其說如痘出齊時卽發水泡是屬乎肝肝不能爲泡肝有邪而傳毒于肺肺統一身之氣而又主皮毛肺經

熱甚故發泡也治法當瀉肝熱先用羌活湯次用人參白朮散去葛根加官桂以防其瀉若肝邪退又當稍清其肺用小連翹湯若起脹時而發水泡是毒氣壅遏留伏于內熱氣衝寔毛孔俱開其疾在脾胃虛弱不能制水濕隨火氣溢于皮膚故成水泡也至于氣勝之論似亦不必執泥如果氣勝不過發空殼而已何水之有此後見水泡先視痘之根脚如根脚紅活用四君子湯倍白朮雲苓不紅活而稍紫者用加味保元湯去苓連暫用一二劑後服內托散去厚朴

至漿滿方止如泄瀉水泡並依用四君子湯加柯子
肉蓯倍雲苓白朮則水泡可爲膿矣至於發爲水泡
也有血熱而發者痘必紫黑其人唇乾口渴大便閉
塞如有此症用四物湯合消毒飲加入參生黃芪少
許有氣不足而毒叅陽位者痘必焦陷其人痒塌不
寧大便溏滑如有此症用保元合四物湯加紅花一
錢燒人糞二分則水泡亦能紅活而作漿矣若無他
症或病者先有疥癬未痊痘必叢集其上待至貫漿
勢必串連起泡不必用藥止用針刺破去其惡血用

百花膏貼之自可無虞

陷伏論

痘之爲症其出喜盡出不盡者伏也出齊喜長長不快者陷也此皆最惡之候害人甚速若欲調理非衝擊峻猛之劑安能起死回生倘見不真用藥相反立

刻殺人不可不慎也古人云伏僅一種陷有多端有
血陷紫陷白陷灰陷不知陷雖不一總之皆以虛實
定治法如出齊後其人大熱不減煩燥悶亂妄見鬼
神腹脹便閉口生苔者此實症也實者邪氣壅遏凝
滯正氣使毒隱于內既出而復入也當用百祥丸或
人參敗毒散宣風散雙解併水楊浴法甚則用熱見
愁千里馬等藥如或吐瀉不止手足皆涼寒戰咬牙
周身大汗好飲冷水悶亂譫語此屬虛也虛者正氣
原虧不能制伏邪氣以致毒出不快乍見乍隱當用

快癰湯合勻氣湯甚則用陳氏木香散異功散外用
水楊浴法如瀉止痘出卽用十全大補湯倘服藥仍
不得出甚至由血陷變爲紫陷紫陷變黑陷痘至黑
陷毒入已深當速用人牙散若痘本稠密其色灰白
根無紅暈有頂陷白陷治之稍遲由白陷而變爲灰
陷者皆氣血虛弱不能化毒成漿故也宜參歸鹿茸
湯若困倦手足冷飲食減少加木香官桂卽用千金
內托散亦可又有一種痘頂甚平而顆粒通紅將成
血泡而不能漿者此氣不能統血而血妄居氣位宜

用保元湯加官桂更有痘紅而皮肉皆紅亦屬氣虛不能統血而血散漫肌肉亦用保元湯加官桂白芍總之白陷灰陷皆屬血虛補血亦不可不補氣恐氣虛而血不收也紅陷紫陷屬氣虛補氣又不可不補血恐血枯而氣反耗也更有一種胃氣大虛不能發養榮衛以致出而復沒灰陷痒塌者其人必飲食減少大便自利或嘔或吐或厥或逆精神倦怠四肢無力此胃虛而陷伏也宜溫中之劑令其胃煖榮衛復行則伏者出而陷者起當用理中湯合調元散加陳

皮陳米糯米萬不可妄下攻劑陷伏雖屬惡症然治之得法皆可成功所切要者當就外症以驗內內外果皆虛寒不可不攻補攻補而功甚捷誠內外皆實熱不可不清瀉清瀉其效亦速第恐誤認則爲害不淺慎之慎之

發痒論

經曰諸痛爲實諸痒爲虛又曰火甚則痛火微則痒是痒者虛與火所致也治者當散邪火補其氣而痒自愈矣然亦未必盡其病也有見風而痒血熱而痒

感觸穢氣蛆虫鑽嚼而痒者試詳言之如痘初見紅點卽遍身作痒此邪氣欲出皮膚閉塞邪火遊移往來於其間宜桂枝葛根湯加荊芥牛子虫退主之有貫漿時而忽作痒者其痘必淡白平塌其人必食少溇便此謂脾胃虛而氣血弱也宜用十全大補湯加防風虫退卽保元湯加防風白芷亦可有收靨而痒者乃膿成毒散邪氣已解正氣將復榮衛和暢津液流行故痒也此爲佳兆不必用藥有因穢氣觸犯而痒者其痒必暴多出膿血當服內托散外用燻法有

因偶感風寒而痒者狀必似寒肌膚乾燥當服八珍湯加防風羌活外用燻法有痘不紅活瘡覺乾燥而痒者是血虛也當用四物加荆防升麻生甘草主之有膿水過多痘覺大濕而痒者是氣虛也宜四君子加荆防黃芪桂枝牛子主之如痂落後遍身搔痒是餘毒未盡見風過早也當用消毒飲去紫草加防風虫退桂枝主之若遍身不痒止有四肢發痒者乃遊毒入內也當以點法大約痒雖不一要其人精神清爽飲食如常卽搔痒忽作可按法藥之而愈也

痘痛論

經曰痘痛爲貴是痛者痘之佳兆也然亦不可不除其病使患者無拘稟呻吟之苦也如痘未出之先遍身皮膚疼痛此表實也當鬆其肌膚用升麻葛根湯加防風羌活若痘旣出而痛不減者是毒盛血瘀也用四物湯加荆防紅花主之至起長貫漿而痛愈甚者乃氣稍虛而血過熱也小便赤者用四物合導赤散加人參五七分至結痂後痘復常痛此非毒也乃痂乾作痛用石蜜潤之其痛卽止或皮痛而痘不痛

是表盛氣實滯而作痛也用四物湯去白芍加荆防
陳皮羌活若痘不痛而皮亦不痛而手足腰背痛者
其說難詳另著諸痛症內

倒靨論

有謂倒靨者痘功將成而復倒入也不知自小脹之
期卽有此症豈必待將成之後而始犯此哉有痘初
出之時一二日細小四五日稍大至六七日間根脚
漸濶痘頂愈平其色淡淡紅白嬌艷滑嫩中間似乎
出皮而周圍若此肌肉僅僅空殼並無血暈此卽倒

靨也當用參歸鹿茸湯加山甲白芍生地白芷香附
主之有爲穢氣所觸而倒靨者用加味四聖湯或人
牙散主之有當靨不靨復入于裡全無痂形者亦名
倒靨當用陳氏木香散甚則異功散大便秘者加柯
肉大便秘者倍當歸有正作漿之時未至充足忽然
飲水煩燥睡卧不寧眼開聲啞喉中痰喘更爲倒靨
俗名輕回爲害甚速不可以飲水煩燥卽作熱觀以
毒入裡非熱藥斷不能出也當用人牙散加山甲末
或異功散加人乳山甲末甚則十三味異功散加羊

乳人乳若痘色灰白眼開消腫大便水瀉痰鳴虛吐者當用十三味異功散加丁香鹿茸柯子藥后眼封痘起亦不可多下此劑當以十全大補湯陳皮糯米調養方妥一方用獨聖散亦可起貫

譫妄論

譫者語不倫也妄者妄有所見也此皆邪氣熾盛正氣虛弱神識不清之所致也如發熱之初卽有此症是毒邪犯心心爲熱迫故有此耳當以導赤散合牛黃丸兼服之亦有胃熱而譫妄者必大便不通小便

赤澁宜以三黃湯去黃柏加梔子當歸滑石主之二
便利者忌用若自起發至成漿欲靨之時忽然神昏
譫妄煩燥不寧亦當觀症之虛實痘之多少以定方
藥如痘本稠密瘡多灰白是精血外耗津液不足故
也當以八珍湯倍歸地加酒炒黃連主之痘本稀疏
色帶紅紫是毒氣鬱遏邪火內攻故也亦用八珍湯
去白朮雲苓人參少許加梔子黃連調硃砂末少許
萬不可純用涼藥致使血凝氣散貫脹維艱也

倦怠論

予見痘疹集要冊中云痘貴精神惡倦怠倦怠者多用溫補不知倦怠亦未必盡屬虛也亦有元氣本弱爲熱所蔽而精神不能舒暢故感是症者往往有之當以保元湯加陳皮麥冬梔子酒芩爲主若起脹之時猶或倦怠顆粒鬆懈皮膚淡白者乃精神不足氣血多虛也多用八珍湯或十全大補湯亦可若痂落後倦怠無力昏昏喜睡此邪氣已退正氣未復脾胃虛弱不能振作故也宜八珍湯加陳皮棗仁主之癥白者去棗仁加荊芥倍歸芍庶可漸壯